

友

聲

集

白醉題襟集卷首

白醉閒窗記

秀水王

丙戌之秋始營草堂規畫麤具庀材度工事未集而歲
云徂於是輟工作以待春及惟西偏之隙室曰白醉閒
窗者先成余飲素不豪復以疾節醉鄉之封已自免歸
矣是居面東右南溫几熨席飲朝陽酌夕暉亦是醉鄉
之白戰也於時拂紙濡墨將大書而揭之復悄然以思
曰天之賦我者何若年未四十是豈閒與醉之人耶又
豈閒與醉之時耶是不可以示人余五齡入家塾一日
過庭先大人呼之曰兒讀書當作何許人余不敢對大

人曰汝試言之不汝責也對曰兒願作正經人時姊若
妹之肩隨者婢僕之環侍者皆笑其言之童騃也余赧
然竊窺大人色喜而無語乃逡巡退其後戲余者每以
其語呼之余輒頰發於面越歲塾師爲余講解省句讀
或遇事偶觸曰是所讀之某句也顧師訓作文而不及
日用心竊疑之久之於所讀書心指曰是某事也是某
事也而師之訓終弗及益疑之數年未敢質於師十餘
歲始泛涉漢宋諸儒心性體用之說乃恍然曰聖賢立
言原切日用後世經師所授者祇作文法也從兄玉爲
自閩歸喜與余講論余始學爲詩兄試輒冠軍卽歲舉

於鄉公車北上余終夜奮思輒汗浹於背是時大人客
游年逾六十矣呼余隨侍日與姊夫錢春渠俱春渠以
經濟客諸侯尤深於詩閒卽與余共論或及當世事至
午夜不寢不數年先母見背大人年益高眷戀庭闈百
念都廢而今風木之悲三年一瞬親喪行外除矣應人
接物處處窒礙每憶童時語復頰發於面而吾親不可
復對矣余固甫中年而天屬之親骨肉重泉空餘涕淚
姊若妹逝者二室人亦不永年兄玉爲客死京邸近春
渠入贛榆令幕復以喪歸矣余所欲樹立者力不逮矣
若人世之富與貴吾欲奉之誰乎與吾共者誰乎生也

有涯爲子若孫計者亦奚以爲則此子敬人琴之嘆山陽鄰笛之感皆余出世之符也然而非以鳴高也顧亦審其機矣草莽之見閉門之車廟堂之謀出門之轍也以余之固陋不足周旋於鄉里其足應當世之務乎其出而摧挫也固宜摧挫之其剛而折也幸矣其或持之不堅而化爲繞指不幾失吾孩提之心乎醉者所以全吾天也閒者所以葆吾真也是余之藥石也書之揭之欲其不忘也愛我者施之針砭起我膏肓是卽余之疾也亦不敢爲醫者諱終大書而揭之并爲之記

白醉閒窗序

鍾吾
卓筆峰
借園

丙戌冬月吾友王君惜庵構消寒小齋邀同人作九九
詩會余以頽唐不爲世知杜門久矣君獨馳簡相招於
數十里外至再余不覺興勃發策蹇赴之入其室藹若
春臺視所書額曰白醉閒窗客指而笑曰主人欺余哉
吾見其朝鑄史而夕研經揮灑絹素屏營花竹終日矻
矻絕少閒時且飲興不豪動以疾謝句客至不過三爵
又安云醉予曰不不夫醉不在於銜杯而閒不在於偈
口也主人雖取高太素映簷白醉之語蓋深得醉中之
情與閒中之趣者若夫晴窗曠日臙腑生華靜室傾陽

肝腸白暖此乃醉中之和暢也迨夫白墮重簷百朋俱潤紅蒸雙頰四座回春此乃醉中之英華也或讀書得間卽側弁以長哦閱史不平每扼腕而太息此乃醉中之號呶也當其凝神纂組坐隱空齋極意推敲走入醋甕此乃醉中之麻茶也有時擘窠書字竟以頭濡潑墨成圖乃用腳蹋此又醉中之幡幡遷遷也凡此皆國風所謂中心如醉而雕龍所謂入與貴閒者也列子云善治內者物未必辭而性交逸旨哉言乎開物成務天下之至煩也而莊生乃曰大知閒閒雷手塗足天下之至勞也而詩人乃曰桑者閒閒苟非然者隋其四肢偃然

一室石居麋處君子何取焉若惜庵者惜陰則減寸爲
分其勤也將以希夫上聖負暄而推己及人其誠也可
以獻之吾

君矣故爲之序

白醉閒窗賦

崇川成 倘盥蓀

吾友惜庵王子抱山林鐘鼎之器兼高明沈潛之長成
杜陵之小築追太素之遺芳朝曦卯飲夕曛濫觴豈東
坡之學佛實次公之醒狂蓋其縹緗插架可稱白衣山
人丹篆吞胷本是紫薇仙吏謝東山之石隱望繫蒼生
寇萊公之葵忱寄情白醉爰構西軒適當南至夢入華
胥之國曹騰覺後三竿律迴幽谷之春懷抱欣然一試
於是摘挾天之才奮生花之筆鏤月裁雲吟梅頌橘雪
點紅鑪香生曲室其樂陶陶德音秩秩醉翁之意不在
酒百年觴三萬六千先生之業可謂勤一月得四十五

日矧復書法黃庭碑工碧落三餘肆志尤傳草聖之顛
八斗論才足解詩仙之縛客飲公瑾之醇人謝杜康之
虐花鳥列於几筵雲煙供其杯杓有酒醕我時復中之
如詩不成何以爲樂迺邀舊雨重整詩盟八瓊刻晷七
步催成壘期五字之堅全憑意匠筆作千軍之氣共鬪
心兵圖繼北風畫境不嫌冰冷春生南國詩才要比梅
清雲水客來不啻西園雅集扶桑日出何殊東海蓬瀛

白醉閒窗賦

鍾吾 陸從星 春堂

宇宙間難索解人漫言酒國名教中自有樂地何必醉
鄉獨醒者徒自苦耳天全者復奚所望身列寰中形骸
莫放神遊象外意趣自長守株何須兔在得意大可言
忘陶令賞音懸綠綺而宮商莫譜屠門大嚼占朶頤而
齒頰流芳惜庵者擅鄭虔三絕之才抱郝隆五經之笥
龍騰虎臥書參換鵝之工霞蔚雲蒸筆有生花之瑞使
人之意也消飲君之醇皆醉同氣相求羣賢畢至蓋用
之則杜陵之厦庇以千間藏之則彭澤之居膝容一室
爰拓南軒以迎冬日春生客座居然花氣融融香浥襟

懷恍展甕頭苾苾煙霞供其笑傲原多絃外之音天地
之無盡藏不是壺中之術矧君樂天知命能藏千鎔之
鋒因地隨時小試經綸之略詩書借以沈酣志量原甘
淡泊應人接物動窺忙裏能閒治劇理繁實於簡中得
約佳日豈任悠悠大謀何妨落落今也因九九消寒之
會遠招心侶閒三三鋤梅之徑重結詞盟樹赤幟于堅
壘邀白戰以短兵題襟之集編成君當繼漢上之倡作
賦之年已度余慚非入洛之英嗜古參衆妙之門有爲
者亦若是關心在千秋之業有志者事竟成

白醉題襟集卷一

長至日消寒第一會小啟

王相

草堂西偏爲噢室曰白醉閒窗適於長至日落成室四
壁以禦寒飈拓六牖而迎朝旭一椽初就四序將周當
天時人事之相催悵秋月春花之屢負急整詞壇之律
壁壘重新思收歲計之功桑榆非晚爰於是日舉消寒
第一會紅鑪綠酒天邊雪意成無活色生香窗外梅痕
開未野人之負暄而樂獻也何從諸君之著手成春袖
之可惜用疏短引徧簡同人各具勝情均攄雅抱欲其
漸入佳境思發於九九圖前亦足暢敘幽情神溯夫三

三徑外

會約附 正

一一九一會卽以交九之日爲定期同人有興欲添設一會者亦聽便如月之有閏可也

一同人輪轉邀集各隨興致毋拘次第似覺活潑前三日或詩或文傳送一邀不煩折簡以避俗例

一會日芳尊苦茗山肴野簋取樸去華以存文人本色

一辰刻聚集酌題分卷早餐後有要事者不妨分應晚酌畢燈下補成藝全方散

一六藝外不及餘事外擾之來概宜謝絕不獲辭則入別室毋敗人意

一會友文字外或工書或善畫皆可訂入會時正課畢別留妙翰以誌雪鴻添助雅興實多

一遠道不能至者可附鱗羽期于九日之內尊作寄到則下課之題並前課諸友之作壇主人錄寄

消寒第一會

長至日集白醉閒窓分體得五絕 卓筆峰

雅意欲迴春開軒面南陸於此會同人一陽正來復
白戰出奇兵負暄日方午對君如飲醇分潤及儔侶
如以樂天裘大庇少陵屋漫云同醉鄉直可比暘谷
衰顏得借紅可愛非綠酒如許坐春風來此過九九

前題分體得七律

平江嚴鶚雲鋤

陽迴猶自逗春光小閣消寒第
紅鑪試擁避嚴霜清香繞室衣冠古冷豔侵肌眉宇蒼
昨夜少微雲外見閒窗圍坐話羲皇

當筵拈韻各分箋七步吟成逸少先窗外梅花逢驛使
座中葭管屬羣賢縱然似醉仍非醉不是詩仙亦酒仙
何必門前栽五柳桃源深隱卽平泉

前題分體得七古

成 儵

天上酒星夜不落光芒醉人不可酌映簷朝日亦醉鄉
主人閉關嫌獨樂舊雨招邀共綺窗窗外梅花香渡江
天時人事相催促獨有詩魔未肯降頽然主賓足良貴
詩情清比梅花味消得尊前九九寒日氣融融襲花氣
座中卓茂年最高

備園

醒眼看詩興不豪砍地歌酣成

第一

惜庵

掀髯笑視心陶陶九數郝隆便腹笥

昆圖

豕

飲澆書意不置子陵五月披羊裘

雲鋤

衝寒酣戰心亦

醉翩翩雲間陸士龍

春堂

詩書麴蘖何春容蘇瓌有子

理可信

惜庵令子綱之
成五律一首

無忌似舅欣追從

綱之爲
春堂甥人生

落落業如此所重二三知己耳吾敢入社不攢眉紀時
紀事亦可喜請看壁上飲中仙一醉各有千秋傳

前題分體得七絕

陸從星

小築南軒結構新負暄舉座自生春阿誰解得此中趣
李白劉伶是醒人

分箋拈韻各紛紛勝友如雲讌樂羣誰似廬陵工作記
醉能同樂醒能文

前題分體得五古效曹子建贈白馬王篇體以白

醉閒窗四字爲韻四首

王相

負背抱紅情拓胃漱寒碧盎然見於面如消酒一石公
等勝公榮分諸座上客走報懽小奚梅蕊枝頭白

南枝梅欲吐可記調羹事共我老山中爾豈有塵累世
上酸鹹殊無復堪位置何如紅兩顴陶然高士醉

高士豈云醉伯倫善閉關冰雪豈云樂來復春當還腰
間雙綬紅不若留朱顏千秋名亦易終古幾人閒

閒者得幾人歲晚臥滄江孤詣肯我攜雄心未汝降世
事倒迴谷文壇精進幢料理題襟集鐫之白醉窗

諸前輩命學賦五律

王炯綱之

落成逢至日小築喜初完此曝原堪獻如醇興未闌聞
詩庭屢過立雪座忘寒黽勉三冬足追隨事古歡

消寒第二會啟

陸從星

尋源而引漁父名亭而號醉翁會集消寒人非趨熱此
中有深趣焉其樂不可極已日月遄邁賓主迭居樂天
誇於微之蘭亭昉乎金谷凡我忘言之契知能不速而
來偶綴小詩謹馳一价

負簷幾日共沉酣未雪先從欲雪看請與羣公邀白戰
短兵再接陣雲寒

雅集招邀共舉觴胷中春已十分藏消寒圖就題襟起
染到梅花九瓣香

消寒第二會

風簾

嚴 鐸

消寒初試御寒簾
一夕西風霜滿簷
室暖夜疑花影暗
牕明朝訝日光暹
重重垂處春波靜
款款舉時素手纖
憶到雕梁來燕子
銀鈎頻捲未曾嫌

火炕

彤雲密布朔風昏
炕暖微須活火存
孤枕不知沉夜漏
曉窗偏自憶朝暾
夢中莊叟春如畫
覺後盧生雪亦溫
想到詩筒驢背客
衝寒應得叩柴門

唐花

漫勞羯鼓報芳叢小閣偏矜蘊釀功富貴訝從冰雪見
英華不待暖雲烘平欺剪綵輸真色不許東皇擅化工
早識韶光任人轉莫將零落怨春風

風簾

卓筆峰

天然雅具護吟窩不使封姨得慙過舒卷何妨同霧帳
輕明渾似隔雲羅留香未許通花信寫照微嫌障月波
預屬兒童勤啟閉春來莫礙燕尋窠

唐花

向榮何事日駸駸花氣偏教火氣侵本擬衝寒隨令序
偶因趨熱動芳心懸鈴愈覺香難護設慢仍憐凍不禁

從古早華易憔悴爭如得地結根深

風簾

陸從星

珠箔湘紋未許同金鈎半押靜無風
雪飄寒卻低垂外
爐撥香留不捲中
夜月漫穿光瑣碎
朝暾微漾影朦朧
莫嫌眼界憑遮障
頓使嚴威無路通

火炕

蕭齋有榻伴黃昏一枕潛消鬢雪痕
香透梅窗縈蝶夢
春回紙帳妥詩魂
陽和氣轉同吹律
偃息身慵等負暄
想到閉門高臥者
一般清興有寒溫

風簾

鍾吾

郝玉光

昆圃

雙銜玳押剪冰紋莫作玲瓏巧攪觀幾許波光搖幻影
那容草色入遙看相依蓬戶非趨熱得庇朱簷獨耐寒
好伴紅鑪風雪夜蕭齋留客共盤桓

唐花

巧轉陽和百卉中能將醞釀奪天工芬芳不假吹噓力
絢爛難憑次第風到眼繁華原是夢邀人矜許易爲功
擬來好並移春檻應與韶光一例同

火炕

成儔

地鑪通穴來風便斗室生溫一榻陳莫笑冰心通體熱
獨全夜氣滿腔春負暄應許能同夢臥雪無難作替人

有客棲枝如凍雀驅寒竟欲託芳鄰

炙硯

膠墨誰能奪化工耕煙幾訝硯田窮分來活火看冰泮
點到洪鑪似雪融比事亦知呵凍拙論功直與曝書同
梅花坑石消寒友多聚喻麋寫數叢

火炕

王相

紅情一覺黑甜回別有溫柔引興來楚岫雲歸迷曉日
莊生蝶化繞春臺暖消青鬢千莖雪嬾逐丹心一寸灰
從此玉山頽不覺冬烘頭腦漫相猜

炙硯

焚卻君苗意轉空阿奴下策漫相攻擊來紫玉煙初化
瀉出雲根漲欲通石骨對人難料峭冰心與世漸消融
莫矜屈鐵鋒微露半是中書崛強中

唐花

元關橐籥莫能爭肘篋無端造物驚畧借人間煙火氣
平翻天上雪霜精菁華不許含貞幹洩漏何緣粲早英
欲問鑪頭誰授訣金丹從古誤長生

白醉題襟集卷二

十二月九日雪霽邀諸同人作消寒閨二會啟

王相

調寄意難忘

快雪時晴訝隔窗曙色未曉晶瑩紅情生暖日白墮照
寒英招數客泛千觥問一度詩盟好收入消寒雅會心
跡雙清 昨宵坐到三更寫雛姬掃雪待取茶烹幾回
纖指歛一帚落花輕閒裏趣畫中情問此境誰爭莫認
作陶家故事仔細吟成

消寒閨二會

自題掃雪烹茶圖

并引

王相

十二月八日初雪諸同人白醉閒窗夜坐窗外雪
深四寸臧君靜園寫雛鬟掃雪余爲補圖同人各
題新句

圍鑪偕客話苦茗出新烹偶倩龍眠筆同傳臥雪情意
中忘著我畫裏欲憐卿頗覺清狂甚含毫對短檠

題惜庵掃雪烹茶圖

卓筆峰

擁簪步珊珊凌風遠黛攢豔驚花影亂韻入帚聲寒夏
玉如聞響成圭未忍殘中冷何足慕取此配龍團

主人多雅興清韻侍兒知素手裁來後朱唇噉破時芬
芳消酒渴清冷入詩脾愧我無佳句衝寒恐負伊

郝玉光

纖纖素手映瓊英一帶收來活火烹忍凍渾忘風料峭
衝寒應怯體輕盈花閒顧影常憐影畫裏逢卿未識卿
一種芳情裏冰玉主人新結歲寒盟

嚴 鏐

評圖覓句共消寒雅趣從君畫裏看爲有陽春新度曲
教人閑筆倚欄干

一帶寒雲見小娃生香不異嚼梅花康成女婢風流甚

愛煮龍團自製茶

陸從星

折簡傳來雋語鑄詩情
畫意兩纏綿圖成掃雪流芳韻
會集消寒答瑞年
斗室鑪生新活火
綺窗梅暈嫩晴天
主人無限清閒趣
寫向雛鬟一帚邊

微舒紅袖露纖纖
貼地瓊瑤觸手黏
一握寒情留眼底
十分冷意透眉尖
臨風猶自團飛絮
解詠從知勝撒鹽
色與梅花爭上下
煎來清味逼香甜

消寒第三會啟

嚴鐸

南仙呂九迴腸

有小引

消寒第三會另檢新題仍遵舊約詩以代簡諸公
既各盡所長歌也有思小子敢自藏其短按紅牙
而敲檀板難追古調於元人唱白雪而和巴詞願
步後塵於朱艷閨會王君惜庵填意難忘詞作簡雖淺斟低唱不
如帳裏紅情而短笛無腔聊佐簷前白醉試歌一

曲以出三單

笑閨餘前詩未改問三九後會頻催風簾炙硯重新擺
煖騰騰炕比春臺索詩不斷門前債傳檄早痊頭上災

真堪愛唐花豔發蜨蜂採好一似意蕊爭開檻俘唐阜
詩囚去箭定天山凱奏回休笑俺敗軍將疲兵難再不
妨三戰各把陣安排

消寒第三會

賦窗紙上冰花

有序

卓筆峰

東山嚴雲鋤作消寒第三會同人畢集白醉閒窗
各擬社題無愜意者時朝日初上窗紙上冰結爲
花如藻荇紛披交橫水面羣相詫曰此大好詩題
遂拈韻分賦以誌一時之興云

主人開軒欲白醉日有晴陽來曝背主人望雪寫新圖
雪卽填空灑然至人苟雅意合天心天心亦解從人意
主人對此興轉豪晨昏與客心兵鏖大展芳心恣蜨採
各抽祕思如蠶繅以此沉酣到三九畫意詩情結窗牖

氣機鬱蒸腐化奇離奇變幻靡不有異采爭覩羣相呀
凌晨睡眠同麻茶一望行波何浩渺胡來藻繪紛交加
絕似花魂得月照恍如樹影當溪斜無乃霜毫競吐豔
不然臟腑能生華細視乃從窗際出沍寒得紙冰爲花
有客得解匪思議此理易明何足異昨宵諸君檢社題
此題大妙天所賜

前題

王相

迴風吹雪穿窗棧簷牙凍折紙作冰土房通火爨且蒸
陽春近隔冰一層春冰欲凝不得凝氣所磅礴窗紙承
裁雲鏤月施精能虛空粉碎健筆凌瀛洲剪水仙人曾

瓊樓玉戲天公增忽張文錦非吳綾或從蛟室貽寒繒
六曲屏宜雲母澣白描不須猩色仍我求畫理先服膺
漸近自然何人徵詠物能事歡吟朋追神取貌相驕矜
於今西北方軍興鐵衣寒裹生峻嶒應有奇功夜半乘
鵝鴨無聲戰馬騰安得載筆宵廬凭銘勲文競淮西稱
徒事雕篆剡溪藤陽烏一耀無依憑頽然就暖枕曲肱
重看幻影分書鐙

前題

陸從星

窗虛不礙曉光明鏤月裁雲幾度成想到空靈中有象
春風著紙散無聲

初疑帶月寫梅真，逞豔爭奇別有神。
悟到天心歸剝復，沍寒清極自生春。

前題

郝玉光

霜痕著紙認朦朧，幻出花枝識化工。
寒透玻璃光瑣碎，冷侵雲母影玲瓏。
欲酬世眼模棱好，墮入方隅色相空。
最好凌晨思作繪，天然粉本列圖中。

前題

成儔

心花怒生空復空，斗室嘯傲光明中。
盪胷倏忽生萬象，精神貫徹天爲通。
天女散花苦無地，偶來窺牖乘霜風。
寒沍冰堅草木萎，點綴窗紙何玲瓏。
清閒領畧竹栢影，

爛漫雕鏤羅浮叢徐熙沒骨殊不肖周昉寫生難爲工
虛空粉碎有畫理欲新耳目非人功消寒雅會剛三九
珠璣錯落盈詩筒昨宵應有生花夢操筆還叩主人翁

梅影

成儁

寂寞空山自寫真韻傳孤詣費清吟每從窗外窺詩客
幾度池邊誤宿禽與我周旋高士意憐卿顧盼美人心
相思夜夜清光發有迹春痕近易尋

前題

陸從星

向暖花分枝外枝半潭清淺恰相宜曉窗掩映春痕滿
幽徑交橫客意癡漫道冰魂多倚附偶憑霜月露參差

傳真妙趣閒中得只在巡簷遠近窺

前題

嚴 鐸

黃昏浮動興徧饒象外春痕入望遙隔水暗香通竹徑
半林斜月印霜橋丰神自合臨池寫鐙火無勞入市招
想到孤山林處士一枝清淺伴詩瓢

梅妻

成 僑

廿載寒窗訂白頭相依形影幾生修春風索笑彈琴對
夜月留賓沽酒謀獨嘯襟懷通寤寐雙清心跡自綢繆
不因相見相思減鎮日吟情入倚樓

前題

陸從星

林下風規通寤寐幽然靜好結襦襟鉛華洗盡能同調
冷淡原甘守素心明月夜窺青玉案歲寒盟勝白頭吟
一家眷屬清難擬有子從知鶴在陰

前題

郝玉光

山中偕隱已多年白首相期意不遷高士何須驚歲晚
仙人亦自有塵緣憐他雪夜甘同夢未許花枝笑獨眠
欲問幾生修得到佳盟常與月同圓

前題

王相

春風吹鬢對黃昏偕隱空期繼鹿門林下高風餘倩影
庭前玉樹惜芳根幾生修到緣重結十載香消夢一痕

誰識老逋清徹骨一天涼月認離魂

前題

嚴 鐸

羅浮夢裏認前因合向孤山證夙盟處士襟懷同月朗
神仙眷屬似冰清白雲滿逕能偕隱香雪千林伴此生
好把歲寒心事共卿須憐我我憐卿

消寒第四會

西王母進嫌山甜雪

卓筆峰

欽仰北辰眷言西狩疇意空山得覲我后何物以將爲

天子壽

一解

緬懷文武世及成康深仁厚澤惠浹遐方

胡乘輿之多駿乃駐蹕於窮荒

二解

顧我瑤池仙凡路

絕萬乘遙臨百牢難設不腆菲儀用先桃李謹進洞淵

之紅蘼與嫌山之甜雪

三解

瓊有液兮玉有漿沃君心

兮滌君腸花雖裁夫六出兮味實取夫中央時與冰霜

而並潔融爲瓜果以齊芳潤稼穡兮餐同其臭佐鹽梅

兮用得其良需甘霖兮因時若偕甘露兮致休祥

四解

維時君王歸息乎法宮潛修乎靜宇藉中和以養精神
甘淡泊以清肺腑俾一世歸于大同乃可徐議夫輕舉
然後與君尋源于員嶠之山采玉于瓊瑤之圃

五解

東郭先生履穿

郝玉光

緬懷名士風矯矯勵行止飛雪滿前村蕭然一敝屣
屐齒鮮蒼苔幽人占素履與誰共古歡冰雪成知己
心知色相空不寄紅塵裏誰得似先生步趨高若此

蘇武齧毡

陸從星

驚砂滿目風捲地逼人純作雪霜氣節旄凜凜心安舒
受乃命者藏乃事說降示意矜殊榮引刀自刺賊臣驚

計窮幽囚置大窖欲殺不殺生不生愁容慘淡雲容深
紛紛大雪沾衣襟思漢不作還漢想齧氊卻有忘氊心
雪汁雖寒酪漿熱自有一腔忠義血節旄落盡雪消殘
扶持應是神明力詭言將軍身已死雁足傳書扶奸宄
此際孤臣泣主恩生入玉門自此始誰言漢德不酬賞
天子非常賜優獎茅土何足榮蘇卿竹帛千秋使臣像

袁安閉戶

成儁

風雪戒寒行路大難賢哉令尹知有袁安
夷齊高節不以餓顯苟非其人心與跡并
在目皓潔入耳希聲聊固吾園匪以求名

臣飢欲死臣心如水夢爲古井波瀾不起

王恭披鶴氅

王相

濯濯如春月柳紛紛散天上花少女風前絮起仙人衣
上雲遮

容似鶯鶯清絕衣如羽鶴翩跹贈簞已無長物御風自
作飛仙

王子猷放船

成儁

所思忽在遠別久難開顏駕言寫我憂放舟剡溪灣
眼花生樹推篷雪滿山清寒得少趣皓潔非人間心不
爲形役俗慮奚待刪情深於一往到門卻復還飄然王

子猷意興何閒閒

謝道韞詠絮

嚴 鐸

超然林下著音徽
慧業如卿得亦稀
千點寒梅香乍吐
一簾春絮影初飛
家庭高咏推才藪
步障雄談解客圍
少女風前重想像
九天咳唾盡珠璣

謝莊集衣

王 相

蓬萊仙仗肅初寅
萬國衣冠覲紫宸
雪色乍催三殿曉
斗杓潛轉九重春
光搖鶴禁珂迷玉
素積螭坳燭燦銀
闔闔仰瞻天日表
拜颺不動舞儀塵
鑪香御座沾殊寵
劍履雲臺矚近臣
和入鳴鸞鏘委佩
清如立鷺映垂紳

散花著體風神朗湛露爲珠沛澤勻寮案傾心觀對越
至尊動色聽敷陳敢將詞賦陪雕輦願致昇平慶一人
六出飛霰稱上瑞三陽候節兆佳辰恭承帝德頒雙闕
肇啟農祥遍八垠簪筆盈庭齊獻頌更邀睿藻墨華新

孫康映字

陸從星

江山渾皓潔雨雪尙飄颺寂寞高人戶晶瑩逸士堂思
酬青玉案身在白雲鄉歛帚來庭畔無聲置座旁繽紛
飛玉屑次第展巾箱不用焚膏繼能延晝漏長魯魚觀
歷歷珠玉燦行行絕勝囊螢耀權分鑿壁光詩書從所
好冷煖亦何常陋室窺懸磬寒瓊早卻霜撒鹽推謝女

作賦憶梁王
白戰無堅壘
陽春有和章
梅花應共嚼
鐙火已相忘
何用鄰家乞
恩私大造藏

王維畫芭蕉

成儔

蕉有心展秋陰
秋心展未已
一夜朔風起
朔風吹雪大
如鴉輞川山人
嗟復嗟
凝碧池頭管絃奏
河山景物都
非舊覆鹿何人夢
未醒眼能爲白
難爲青雪刃叢中
生意無生還寫入
北風圖
剥極芳心終不死
低徊往事空
踟躕

裴度平淮西擬凱歌

卓筆峰

竊據雄藩世子孫
蹇從刀下寄游魂
賊臣寧解包荒意

江漢憑陵肆欲吞

裴相登庸意始驚從來氣奪貴先聲嘉謀入告皇猷壯
大起臨淮四路兵

僕射臨戎間出奇不誅降將得機宜乘虛直取張柴道
士馬衝寒夜半馳

刁斗無聲夜寂寥彤雲密壓陣雲遙顛狂任爾排空舞
日出環營立見消

冰花結鎧碧連雲鵝鴨軍聲慘不分萬衆城中齊喪胆
謂從天上下將軍

同雲密布鎖城壕殺氣填空下血毛雉堞垂崩重有約

居民不許犯秋毫

諸將勲庸賴指揮萬方從此震天威淮民盡戴回生力
應向我公賦衮衣

散甲歸農殲厥魁迎門士女感懷來謀成不用窮兵力
上相輕裘凱奏回

白醉題襟集卷三

丁亥元日消寒第五會啟

王相

漢書曰七始華始肅倡和聲注七始天地人四時之始
華始萬物英華之始也天地四時而人也錯乎其中得
不深思之哉竊謂詩之爲道漱滌萬物機杼一家以之
發天地之華應四時之始庶足以言之元日

聖天子恩命疊沛薄海誕敷盈

廷百弼潤色

鴻業賡歌喜起然而茅檐高話末由躬與拜颺之盛至
若闐闐紛華之地酬應爲煩深巖邃谷之中又惟自吟

自賞思欲飛觴洗盞唱予和汝曾不能求之是日也惟
我同公九九消寒之集丁亥歲朝適爲第五會衡泌
棲遲少長咸集旣無賀答往還又有朋游簪盍是與人
同樂而抱惟我獨得之奇天所與者若何其厚宜若何
思所報耶龐士元謂拔十失五猶得其半茲則得其五
矣若生花之管與歲華爭麗除其舊而新是圖又當以
前之未進者爲失而後此之進爲得五焉竿頭之效願
與同人共勉之家右丞曰非子天機清妙豈能以此不
急之務相邀請誦之以訂歲朝之約

消寒第五會

辛盤

成儁

不知辛苦意原自在盤中薑桂情先契酸鹹味畧同韭
花臨帖好蠶曰措辭工元日和羹理如琴六氣通

爆竹

除歲聲猶續新聲入耳歡雷霆走精銳家國報平安春
共椒花獻寒消柏子攢驚人無細響借作火城觀

春聯

郝玉光

春啟維新象人工雅頌聲徵祥一歲首獻祝萬方情非
鳳題常遍隨桃序已更瞳矐臨曉日瑞氣溢雕甍

桃符

一自飲屠蘇新桃易舊符分年權代擅驅祟用非誣人
識神姦遠靈徵草木殊千門同一色如繪歲朝圖

門神

嚴 鐫

明禋列五祀氣象一時新威著當關勇高居要路津推
敲難避俗敢閉本因人鎖鑰何煩寄么麼已畏神

湯團

玉屑瓊漿裹團圓月窟傳流匙分白粲濺齒綻紅蓮自
具浮沉相人多歡喜緣天然祭詩品易餅惜珠聯

牙餠

陸從星

春盤頻檢點先勸是牙餠脫口同膠固觀頤祝玉成香
融消粥凍暖至憶簫聲遮莫剛柔濟動搖全不驚

名紙

王相

不必藏懷袖先聲處處傳交同桃李換名付棗梨錦綺
陌餘霞散朱門舞蝶穿積薪應致嘆捷足莫爭前

鴉羽

潛居錄巴陵俗元旦梳頭先以櫛理鴉之羽
毛祝曰願我婦女黥髮影影惟百斯年似其

毛羽

盤鴉鴉借色重致歲朝辭春向蘭膏駐情餘玉鏡知佳
盟要百歲香霧裊千絲曾帶昭陽影唐宮劇惹思

消寒第六會

春思

成儁

采得雨前茶又見陌上花
忽念遠行客不如早還家
門前十字路芳艸接天涯

感遇

陸從星

飛鳥懷舊枝游魚思故淵
幸遇回飈起吹我返故山
故山多喬木喬木借鶯遷
敝廬足綢繆風雨漫摧殘
願爲中林樹逢春生意全
枝葉豈不害所幸根葉連

上有千尺松下作千重陰
含露滴秋草滋生遍空林
蓄彼桃蟲穴忽生反噬心
雖占剝膚疾差喜託根深
感物

契中情中情難具陳萬物理不齊皆涵長養春

丹青引題失名畫

有記

卓筆峰

丙戌冬月過吾友王惜庵家惜庵出所藏古畫命
品隲之余既次其高下矣最後出潑墨四軸如古
釵鏤如漏屋痕筆甚草草不求形肖而機趣橫生
指與物化乃不禁詫絕曰君從何處得此神妙耶
王君爲余緬述而深致慨焉蓋吾邑故家某蓄此
十二幅揭之屏久以尋常視之有僧某者以畫自
鳴於市故家子聞而慕焉乃刈此以易彼畫僧顧
而唾曰若是閭閻者烏足易吾畫哉抵之地故家

子旣自醜其畫又憤僧言乃碎裂棄之去標工某
拾而置諸肆求以賤售卒無顧者王君偶過肆見
之如獲異寶更問其外八幅皆已粉碎虛空不可
復追尋矣噫作此畫者殆癡人哉畫如僧某已自
誇詡一時卽詣而精之欲求知於今之賞識家亦
不過恬其筆墨潔其粉脂勤求於形似而已足矣
又奚必窮神入化而至爲人所唾棄胡爲哉將謂
作者取以自娛亦不當輕擬與人茶熟香溫自作
自賞於寬閒寂寞之鄉身死卽以爲殉埋珠玉于
窮泉化神奇爲腐臭不猶愈於辱市人之目乎若

必欲散著人間以待後之識者則大謬矣如此十二幅留於人世不知幾歷年所而卒爲孺子之割裂髡奴之笑罵求所謂識者安在哉雖有王君爲之珍藏亦僅留精神於萬一求其姓氏而已茫不知爲誰何矣惜哉四幅者一畫古木蒼鷹拘頸側目狀若尋物一爲蕉陰鳴鶴一爲渴鹿飲澗望而烟波浩渺荇操紛披者則浮鴨雙泳也凡此皆人所易肖者而獨絕去筆墨畦町殆天成非人力也與王君歎惋彌日爲記之如此

此畫不知出誰手古淡天然今罕有主人留我披斯圖

生意蓬蓬滿窗牖忽覺空庭生綠陰破蕉幾筆何蕭森
下有鳴鶴引長吭耳畔仿佛來清音醉墨乘酣試一潑
尋常畦町筆能脫奔泉渴鹿意甞甞飲澗神情宛如活
畫松昔稱唐韋侯畫鷹無過張僧繇今觀此圖寫神駿
孤幹峙立真其儔任意揮毫似草草一望烟波何浩渺
浮鴨翻波影動搖滉漾波紋露雙爪我嘆此翁何太癡
大文彌樸誰能知華冠幾被沐猴碎好詩豈免髡奴嗤
通靈自古遭天忌况復不盡合人意太羹元酒索遍嘗
幾何不爲人唾棄人生每欲恃多才嗚呼多才安足恃

洛陽女兒行

王相

洛陽甲第連長衢誰家女兒新嫁餘由來夫婿金張貴
日夜經過戚里居明璫翠羽垂交佩寶扇香車分綺隊
鸞刀縷膾錦水鱗豹胎飛賜天廚味良人寵愛一身依
宜笑宜嗔無是非後房粉黛難成色昔時姊妹不同歸
蹙金孔雀繡鴛鴦不用兒家機七襄連理帳深催進曲
合歡衾煖卻薰香啼眉顰齒新妝競明月珠光枕痕映
芡藕村裏浣紗人朝朝照影清溪鏡

閒窗小集贈同人

王相

幽窗如水靜暖日共花醺何不謝塵事春風搖白雲
鴉飛千里見鸞嘯半天聞已會無絃旨鳴琴偶爲君

過故人莊

陸從星

流鶯啼野岬春水遶孤城到此紅塵遠來尋白石盟衣
冠敦古處渾樸見交情有約重相訪開門一笑迎

客至

郝玉光

柴門寂寂遠山城鎮日無人少送迎偶賞新花尋酒債
忽來舊雨訂詩盟洗塵初試開樽意燒燭聊陳剪韭情
雨罷暮天渾不倦還邀文戰競心兵

無題

嚴 錫

莫愁湖上倚蘭橈璧月同吹紫玉簫黛色欲憐春影瘦
癡情如怨杏花嬌鑑停荀令香猶在燭暗何郎夢已遙

不惜平量珠十斛天涯無計覓紅綉

多情轉覺羨無情不斷春愁次第生塵夢尙能通月府
仙緣終遣隔雲城機中錦字酬前約壺裏紅冰醞後盟
一種相思深入骨補天縮地兩難成

江南曲

嚴 鶚

春水漫雙橋春風嫩柳條良人非重利妾自誤花朝
昨上江樓望湘帆一片來鄰家吹玉笛知是遠人回
紫燕語雕梁鴛鴦宿南浦但解效于飛焉識別離苦
團圓天上月夜夜照窗明怕聽銅壺滴驚回萬里情

桃花谿

成 儔

一溪流水杳然春夾岸桃花解笑人身到仙源最深處
卻從何處問迷津

近試擬作

郝玉光

昨夜東風迴玉律遍吹楊柳綠參差流鶯肯負遷喬意
許借靈和第幾枝

元夕消寒閨六會啟

陸從星

效連珠

蓋聞雲性能閒隨風作態山形本靜因雨增青是以聲
應氣求傾蓋訂同心之侶倡予和汝伐木聞求友之聲
劍逢季子而解贈馬遇伯樂而長鳴

蓋聞四序無言歸天心之剝復三時不害階春景之煦
噓是以明月夜珠振英辭於元夕駢拇枝指占芳序於
閏餘

蓋聞積健爲雄非關幸獲因難見巧每待追尋是以蠟
炬有輝安明未燃之火箏琶凡響轉遏不鼓之琴

蓋聞良冶無坯當鑪致慨良工無璞袖手旁窺是以鐵
遇甄陶襍琳球而竝進玉未雕琢與砒砭以同遺

消寒閨六會

春燈詞

王相

男未春耕女未蠶人生福地住江南上燈時節將圓月
如此良宵正十三

六街錦繡海波遙逐隊笙歌起暮潮明月已開天不夜

還將鐙事預元宵

宋史淳祐三年趙
京兆請預放元宵

一聲鳳吹拂雲迴幾簇鰲山寶燄開忽引游龍天矯出
萬人爭擁火珠來

珠聯螢散氣如虹百八牟尼四照空月地星橋生彩燄
人家都在五雲中

帝京景物畧正月十三日家以小錢
一百八枚夜燃之遍散井窻門戶砧

石曰
散鐙

春鐙謎語出專家浪裏魚龍葉底花不遣光明生智慧

障人眼界一重紗西湖志餘元宵前後好事者或為藏頭詩句任人商猜謂之猜鐙

紅妝如霧酒如淮穩貼花鈿整鳳釵可識五更風似剪

寒鐙一穗掃長街乾淳歲時記元夕夜闌有持小鐙照路拾遺者謂之掃街遺鈿墜珥往往

得之

紅鐙吐燄若為收人願天從樂事稠一自上元增兩日

月輪側讓夜珠留宋史乾淳年詔增十七十八兩夜謂之增上元

萬姓祈年出至誠大家祈雨莫祈晴待看五穀都豐熟

來歲春鐙一倍明

前題

陸從星

看鐙循例自年年笑語平教一闕填清興別饒誰共賞
花將入市月將圓

鼙鼓殷殷走怒雷驪龍首爲戲珠回人烟簇處雲烟合

可帶甘霖一尺來

時微旱
祈雨

前題

嚴 鐸

千點金鐙萬象涵銀蟾初擁出雲嵐天宵一派笙歌沸
贏得嫦娥半面探

卅年青鬢客游多處處華鐙聽綺歌記取吳閭歸棹晚
春星萬點照江波

消寒第七會啟

卓筆峰

白醉閒窗移文

梅傳春意窗勒文移信風頻送驛使重馳緬惟萼綻黃
杏軒開白醉蘭帖揭黃墨池流翠會號消寒人稱韻事
慚余蓬革之陋姿得近烟霞之高致何其幸耶竊窺諸
君子筆方列陣旗未書降歲計有餘似五年而再閏惜
春堂兩舉閏會射必命中每一發而疊雙詩是刪餘尙存三百
十一首酒如樂只會須三萬六千場知前言之猶在諒
久要之不忘且此地經史倉箱文章淵藪體具雙毫書
藏二酉舒吟嘯於篇章敘襟懷於杯酒登高作賦閒來

華子岡頭乘興尋詩不出烏衣巷口鐙方展乎上元節
又臨夫燕九參差浪影池漸含苔漏洩春光圍將變柳
倩綠竹以傳書感黃鶯而求友於斯時也而可負諸將
見唾生珠玉吻燦瑤葩樓成五鳳賦就八叉結吟情於
屋角飛逸興於檐牙壁上揮毫泥堪運帚柱頭搗藻筆
可生花愧無披拂於紅袖敢請籠護於碧紗

消寒第七會

揚子雲草元亭

郝玉光

千秋著述少攀躋問字猶思斗酒攜絕似馬融開絳帳
可曾劉向照青藜元成直擬羲能繼法應常呵聖莫詆
地下倘逢林處士茂陵遺草若爲題

諸葛公南陽草廬

陸從星

渭濱有釣叟莘野有耕夫同抱經世道乘時任卷舒南
陽潛臥龍遵養同一趨俯仰觀元化天地等蘧廬日月
弄雙丸流耀明窗疏躬耕事南畝有桑八百株斗室足
嘯傲聊以保真吾中原方逐鹿羣雄生覬覦哀鴻滿中

澤靡止歎飛鳥未能作霖雨且與木石居良材難久留
本爲世所須三顧感知已幡然許馳驅澤民守素志致
君恢良圖遙遙伊呂蹤出處若合符

王右軍蘭亭

成鶴

蘭亭久心寫夢想時在襟客從會稽來歷歷爲我陳羣
峯競秀削亂泉瀉曲澗有亭尙翼然未審古與今修竹
不受暑茂林餘古春昔賢修禊事於此盍朋簪右軍名
最著序筆千秋欽當時少長集各亦多清吟所遇無故
物疇復懷好音人傑地乃靈選勝況山陰瞻言懷禹穴
蓑笠終追尋

李謫仙桃李園

陸從星

林中花似錦陌上草如茵拾翠尋芳後攜柑載酒頻夜
遊良有以烟景本相親客喜逢嘉節筵開及令辰何煩
絲竹盛惟愛性情真月映杯傾玉風搖燭燦銀絳雲籠
宿霧白雪淨香塵競豔精神爽爭妍棣萼新名園爲地
主樂事屬天倫幽抱融和暢高談觸引伸觥籌欣舉錯
吟咏待推循細讀青蓮序長懷古處純

裴晉公綠野堂

卓筆峰

自古所稱幹濟才大抵多自田間來迨其功成身早退
懸車依舊歸蒿萊裴公自是棟梁器況復躬逢中興世

片言契合便登庸六師一出擒元濟入告雖蒙聖主知
成功未免恤人忌權輿私造非衣謠唱聲萬口騰喧囂
幸而屬主明其誣不然幾被羣言搖後雖詔還重輔政
梅鹽折足難爲調道喪摺紳羣小聚政歸閭豎中人驕
至此始無經濟意乞骸許歸集賢第公初本意平諸藩
未盡其才終賁志歸來乃闢綠野堂蕭然野服同村叅
治第意豈誇榮寵名園寓不忘農桑招集羣賢共吟咏
流連永夕聯杯觴知公未必荒酣宴時事借此聊相忘
公今去我已千載過者興懷猶慨傷勝跡雖然同草蔓
英名應不隨烟荒

邵康節安樂窩

王相

日入息歸鳥吾生亦有託風雨敝廬深此中自安樂

身未絕人境而無世慮營問君何能爾常修心太平

河洛經世心綢繆徹桑土一編擊壤歌

先生詩集名

斯人原

太古

求友出深林諸賢寄宿止行行迷故巢

司馬諸公仿其居爲先生作行

窩春風隨杖履

陸放翁書巢

王相

鄴侯架曹氏倉李家書樓劉墨莊郝生無地腹作笥衡陽手錄存巾箱求若劍南詞客詩中豪縱橫卷軸書爲

巢想見其枕經靡史寤寐醉醒深薰陶手未嘗釋心無
所消蕞殘不自理獺祭任人嘲星羅綺錯不用相題標
自有褊褊羽鶴銜出能分曹請爲先生相彼理窟拓茲
仁宇太極爲堂奧乾坤爲門戶助以傳書鑿牖明語出論衡
此中化日舒太古更將津逮夫小酉之山有積書之巖
羣玉之府宛委金簡之函元夷蒼水使者監問洞天福
地之名是曰瑯嬛

桑民懌獨坐軒

成儔

君不見高堂華屋敞賓筵紛紛朱履來三千又不見
藍靜室習枯禪忽忽面壁空九年出彼入此皆可憐增

華航寂何嫵妍惟有桑君雨不然軒名獨坐手一編意
匠默運週八埏心齋自得忘言詮廣搜博采頗不廉尙
友千秋希聖賢笑我棲遲無一椽勞薪到處如郵傳何
當卜築南山顛閉門不出畊硯田興來情往招雲烟兀
兀與我相周旋

白醉題襟集卷四

消寒第八會

紫姑謠

卓筆峰

采溪毛薦野蔬村裏女兒迎紫姑以箕爲鼓帚爲馬往
來求之園林下長女舞婆娑少女歌咿啞陰瀆陽溝神
去來恐瀉紫姑雙繡鞋觸姑怒兮姑不降使我所求不
得諧昔日紫姑遭妒虐自今聞之心猶懼呼嫂持竿趕
鳴鳩莫遣枝頭喚姑惡

花姑吟

王相

葵金鑪宛轉歌吳飲花影當筵勸行酒鳥聲枝外喚捉

壺葵金鑪迎花姑 醉春釀明月杯中漾金支翠旗光
有無紛紅駭綠迴仙仗 醉春釀花姑降 花常開東風
與剪裁十二萬年春不老衆香國裏挾天才花常開待
姑來 花不落金鈴響繁索千林綺錯樹交枝不斷生
香出叢薄花不落與姑約 祝春陰香霧一林深蘭逕
濛濛雲鬢溼釀花不礙曉寒侵祝春陰悵姑心 祝春
晴烟光一片明滿鴈斜陽遲去鳥畫橋明月度簫聲祝
春晴暢姑情 祝春風吹花擘柳中不遣鳴條驚客夢
微宣橐籥佐元工祝春風成姑功 祝春露湛湛凝珠
樹木蘭曉墜天乳含膏液流恩深布濩祝春露爲姑注

酬春朝綺陌兩回潮十重錦障珊瑚碎千金裘換酒
旗驕酬春朝解姑嘲 酬春夜樂事如波瀉歌管聲喧
玉漏沉柳枝眠起黃鶯罵酬春夜問姑價

酒香山歌

陸從星

好山好酒我心寫幾人把酒看山者每歎尋山載酒難
何幸山名酒香也洞庭君山昔所聞山有酒香流清芬
楓林丹嶂足佳賞霜顏髣髴含沉醺憶昔陳王誇豪右
願傾東海以爲酒興酣落筆徒空言海所無者山乃有
何必一斗論十千何必逢車空流涎取之不盡用不竭
會當一醉山中眠

黃綿襖子歌

成 儁

黃綿襖黃綿襖其雨其雨日杲杲歡呼聲裏歌聲早豈
眞衣被及蒼生難得乍得物最好夏日可畏冬日可愛
數見意不鮮人情都易改去年無雨一冬晴白醉酣歌
朝日明入春雨亦如油貴高田黃埃逐漸生行歌陌上
逢野老黃童白叟分明道沾體思著綠簑衣挾纊不用
黃綿襖

消寒第九會啟

郝玉光

集司空詩品

大河前橫柳陰路曲築室松下左右修竹載歌幽人載
瞻載止妙不自尋俯拾卽是水流花閱清酒深杯令色
網繮似往已迴

沉著

纖穠

疎野

典雅

洗鍊

清奇

實境

自然

縝密

精神

飄逸

委曲

高人惠中飲之太和坐中佳士疎雨相過淡者屢深幽
行爲遲欲返不盡脫帽看詩妙契同塵薄言情悟橫絕
太空虛佇神素

飄逸

縝密

雄渾

高古

沖淡

精神

典雅

疎野

曠達

形容

綺麗

自然

落落欲往觀花匪禁碧桃滿樹紅杏在林好風相從妙

機其微明漪絕底碧苔芳暉如是得之猶春於綠如瞻

歲新其日可讀

飄逸

沖淡

自然

典雅

豪放

精神

纖穠

超詣

綺麗

疎野

高古

縝密

百歲如流萬取一收日往烟蘿步履尋幽如寫陽春古

鏡照神生氣遠出與古為新真與不奪真取弗羈書之

歲華荏苒在衣

悲慨
洗鍊
典雅
沖淡

含蓄
精神

曠達
纖穠

清奇
自然

形容
疎野

消寒第九會

五君詠

紫竹

卓筆峰

函關望氣影飄蕭
美借東南色最饒
籜解梅岑鸚鵡慧
粉殘蓬島鳳皇嬌
裁書自可垂仙詔
截管真堪配玉簫
徧取羣芳無可似
霜梨不屬漢宮條

斑竹

蒼梧異產傍江涯
翠籜偏宜點綴加
大抵良才能錯節
須知美玉不藏瑕
管窺似見林中豹
袖倚如沾石上花
聞說湘妃揮泪染
至今過客尙興嗟

方竹

此君賦性似乖疎畢竟端嚴與衆殊自有虛心存矩矱
每逢大節見廉隅持躬峻潔宜霜簡處世模稜嘆酒觚
恰可中庭明月色凜然風範足臨摹

朱竹

成儁

此君火色世應無霞舉軒軒物態殊質異蒼筤非震象
中虛光耀本離符也應結實來丹鳳可待成陰覆赤烏
移向石家金谷裏分明七尺好珊瑚

白竹

自是瓊林玉笋班何年吹落到人間乍看明月來三徑

合與梅花住一山結實晶瑩招白鳳留賓爛漫醉朱顏
影搖虛室渾忘暑飛白書成意態閒

斑竹

鷓鴣聲裏足千林帆轉瀟湘一路吟癡詎易求多勁節
文章終著爲虛心佳人倚遍螺紋印名士書餘墨暈深
自是此君眞面目湘妃傳誤到于今

方竹

大地菁英賦碧筠影流玉水記前囚模稜畢竟非佳士
芒角生多爲俗人肯令規圓從世好何妨絜矩託芳鄰
品端已著淇園什玉尺同看席上珍

朱竹

陸從星

紅雨新抽玉笋班晴霞遶徑自迴環珊瑚樹拂持竿處
琥珀杯傾借葉殷佳士豈云沉宿醉此君端合駐丹顏
主人莫向臨溪種恐使漁舟誤往還

白竹

投紵何人贈此君翩翩綺袂迴離羣座延佳士原如玉
枝拂青霄欲化雲侵葉霜痕渾莫辨穿林月色淡無分
記曾倚檻親鐫句書破羊欣舊練裙

斑竹

記取精誠感翠篁陸離焜耀燦行行九疑本近文身地

千畝應羅錦繡腸莫嘆虛心經薄蝕好憑青簡汗行藏
籠烟未許窺全豹雨後平添玳瑁光

朱竹

王相

柯亭爨後發英華丹鳳棲餘碧玉遮兀兀醉傾千日酒
軒軒神舉半天霞檀欒爲報平安火淇澳能開智慧花
持作釣竿東海去珊瑚低拂萬枝斜

白竹

枯禪幾版舊同參林立還餘太素含雨爲跳珠來硯北
風能戛玉到花南書時个个臨飛白界處行行破蔚藍
多恐易污緣太皦不緇或有此君堪

白醉題襟集

卷四

七

紫竹

竹譜生二年色乃變三年而紫

草堂何處帶春星
隱隱光流竹裏亭
三詔泥書新賜紫
兩年雪苑舊紆青
垂虹飲澗日初落
飛電穿林雨未停
一自蓬萊分得後
浮筠仙種毓神靈

斑竹

苔封筠籊薜花滋
脫手文章著陸離
錦褱乍開深暈紫
青衿欲改素塵緇
一林色暗鷓鴣雨
千點愁凝杜宇枝
何限蒼梧懷古意
江流無語繞靈祠

方竹

玉筍新班自不羣
詩歌有斐切磋勤
從知絜矩成佳士

豈在圭棱見此君斜逕風來迎刃解中庭月轉向隅分
何緣鑿柄驚斯世祇合規圓更運斤

紫竹

嚴 鐸

乍脫青衫上九霄凌雲換得紫羅袍霓裳舞處驚人豔
玉筍齊時羨爾豪渭水春風情旖旎函關秋色影蕭騷
秦樓遺韻流芳遠聽到簫聲憶鳳毛

朱竹

郝玉光

一片朝霞護茂林竹園深處火雲深人欽正色標君子
鳳託丹誠寄好音每以光明昭勁節須知離耀本虛心
從來清極能生豔蔭滿前川總綠陰

白竹

桃花校外見瓊英
千畝晴雲入望平
笑我青衫渾未改
憐君綠鬢幾時更
月明渭水清無價
玉戛秋風靜有聲
一片虛心還太素
不留色相任人評

紫竹

差喜凌雲意氣符
青衫卻與舊時殊
淇園散彩光流電
渭水騰輝色間朱
翠袖霓裳爭掩映
碧雲絳雪認模糊
梅岑林畔多靈種
移向人間得幾株

方竹

一徑森森得未曾
漫呈圭角露棱嶒
當窗幾肖窗留影

印月難窺月作朋勁直原堪昭矩矱堅剛安肯效模稜
憐他負異非時玩簫管無由奏爾能

朱竹

淮陰

蔡瑞芝月峯

深林雨過晚霞晴返照蒼簷分外清似夾桃花增秀麗
如迷楓葉不分明此君未必遺紅怨留客多因看碧成
回首淇園欣雅集文章燦爛繫予情

方竹

何須折簡赴征途惟問平安信有無翠袖不難遮一角
虛心自可反三隅枝從池上移華月華月照方池影入庭中
照水盂孟方水莫訝凌霄能直上此生大節中規模

消寒第十會啟

王相

送九九辭

盡九九兮春風和灑良疇兮春雨過鳩鳴兮遠村含蕙
萼兮庭柯我所思兮遠道極天涯兮春草芳多轉蘋末
兮拂蕙叢懷君子兮意如何送九九兮做文軒春風入
座兮旨酒盈尊憶經時兮寒氍坐破寒意消兮春情無
那理蕞殘兮陳清課重致辭兮我歌子和揖九九兮與
君小別春何蔚藹兮寒何凜冽春不須迎兮寒不須訣
獨依依兮兩心如結疇春陽之繡錯兮而不醞成夫冰
雪懷去思兮流鶯與說翳繁言之亂耳兮來過枝頭之

百舌

消寒第十會

田家雜詠

陸從星

西京崇明詔下代畎畝憂矧伊爲衆庶敢忘衣食謀旣
以力南畝還當事西疇陌上餘花落隴中新綠抽田歌
相互禽鳥語雜唱酬持豚醑杯酒穰穰祝有秋

身落世網間所志在農圃恐其失所居忘卻敷菑苦徒
誇縱達才縱達亦何補何如殫陳修執卑莫予侮

青青原上草曖曖隴頭雲雨助禾麻長風來餅餌聞熙
熙相往還如逢太古春謀生此爲善守拙聊補勤超然
脫塵網智巧徒紛紛

有時帶經鋤謳吟不絕口田父前致辭謂我非耕耨莫
笑綿力薄之勝袖手豈圖眼前功所貴在積積古
立良苗非種鋤惡莠饑饉雖薦臻穠莖逢大有出八閩
此言一笑不回首

和澤無常期鎡基貴乘時耕耘一怠緩不免寒與飢
安多酖毒辛苦無是非努力理常業焉能接馳暉奄忽
歲云莫雖悔亦何追

冉冉歲云徂北風何慘慄嗟我禾稼同休休羣動息良
士思其居好樂無終極妻孥有餘歡朋酒足飲食不識
而不知何有歸帝力

前題

郝玉光

翠爲屏障玉爲林梨有瓊葩桑有陰一任牡丹誇富貴
菜花畦裏萬黃金

催耕布穀計初終南畝已勤開歲功檢點腰鐮頻淬勵
隴頭二麥熟天風

女織男耕谷有司山農辛苦互相資兒家畊織一身并
長婦攜鋤幼婦隨

平原雨過荷鋤歸一片蛙聲送夕暉偶與前村鄰叟遇
班荆閒話豆花肥

每逢風雨樂畊餘執卷長吟意態徐茅屋數椽聊部署

半堆犁耙半堆書

前題

嚴 鶚

春社初開二月前
村村簫鼓競祈年
鄰翁帶醉孫扶杖
歸向芳郊蹋晚烟

剪刀風裏柳絲絲
雨足郊原萬物滋
三尺柔桑爭吐綠
今年多道好蠶時

柴門溪水層層碧
曲岸飛花片片紅
一望祇園金布地

田家春熟慶時豐

吳俗春熟
菜勝於麥

漫天布穀鳥飛殘
水面秧針漸覺乾
辛苦農家是此月
桔槔聲裏送朝餐

綠樹陰濃覆野塘
新蟬戛戛響斜陽
宵來一陣西南雨
又送蛙聲徹夜狂

西風芒稻半青黃
取次嘉禾已滿倉
楓葉落時新釀熟
民家十月早輸糧

前題

王相

腴田力易墾
偶歉失其常
瘠土終歲勤
所得未足償
辛勤饘粥具
垂老筋力強
語兒慎勿易
幸獲非所望

炎夏急農功
揮汗日杲杲
共歇柳陰涼
縱橫藉淺草
絡繹起征塵
往來分大道
相就乞壺漿
涓滴以爲寶
喘息未遑蘇
顧影首復掉
問君餘幾程
指數關河杳
吾儕苦

筋力所事獲溫飽歲功有時息飛夢田園繞日日看交
衢終歲何時了

白醉題襟集卷末

後序

集文心雕龍

卓筆峰

仰觀吐曜臭味晞陽苑園文情篇章戶牖況清風與明月同夜奔星與宛虹入軒實羣言之奧區而文章之宅宇也夫設情有宅屬思無方仲宣溢才而析辭尙簡王朗節省而吐納自深驚絕乎妙心才爲盟主發端之首唱蔚爲辭宗枝附影從事不孤立樹雜雲合辭忌失朋是以四牡異力兩字連形支體必雙服乘不隻暇豫文會揄揚風流秘響旁通焜燿似縟錦之肆同聲相應岳湛曜聯璧之華方是時也雪霰無垠有踰畫工之妙金

玉殊質並歸雕文之區蓄隱而意愉觀倚而心躍蓋陽
氣萌而元駒步木體實而華萼振動植皆文物色相召
選言於宏富之路銳思於機神之區餘味曲包若遠山
之浮烟靄伏采潛發譬卉木之曜英華鏤心鳥跡之中
窺情風景之上夫文變無方辭動有配則舒懷而命筆
并思合而自逢莫不淵岳其心梗柎其質聲似竽籟和
若球鐃觀瀾以知源殊聲而合響理欲吹霜歎露深淺
而各奇譬諸裁雲製霞抑揚以發藻斯又小製之區眇
亦心聲之獻酬也且夫思有利鈍氣有剛柔瓌穎獨標
拙辭難隱必兼解以俱適憑情以會通是以將閱文情

鮮無瑕病獻可替否共相彌綸瀝詞鏘思各照隅隙裁
文貴於順序改章難於造篇陸賈叩其端各入討論之
域敬禮請潤色必歸艷逸之華若擇言於涇渭之流每
馳心於元默之表則顧盼可以驅辭力蓋纖瑕不能玷
瑾瑜也詳觀近代之論文多矣多賤同而思古四序之
動物深矣則披文而見時氣以貫志高論鴻裁序以建
言辭翰鱗萃譬乘舟之振楫集雕篆之軼材攀響前聲
未變古式各含殊采并總羣芳若夫絕筆斷章以意新
得巧至於割情析采而慮動難圓識在餅管固中人之
常資艷溢鎔毫迺小子之垂夢歟